



Broj: 05/8-50-14-632-8/12
Sarajevo, 18.2.2013.

Z A P I S N I K

8. sjednice Komisije za izbor i praćenje rada Agencije za prevenciju korupcije i koordinaciju borbe protiv korupcije,

održane 17. 10. 2012., u vremenu od 10 do 11,50 sati

Sjednicu Komisije za izbor i praćenje rada Agencije za prevenciju korupcije i koordinaciju borbe protiv korupcije sazvala je predsjedavajuća Komisije Dušanka Majkić.

Sjednici su prisustvovali sljedeći članovi Komisije: Dušanka Majkić, Borjana Krišto, Mirsad Abazović, Staša Košarac, Niko Lozančić, Beriz Belkić, Milorad Vulić i Milenko Obad.

Opravdano je odsustvovao Sulejman Tihić.

Sjednici su prisustvovali i gosti, predstavnici institucija BiH, međunarodnih organizacija u BiH, kao i predstavnici službi Parlamentarne skupštine BiH:

- Sead Lisak, direktor Agencije za prevenciju korupcije i koordinaciju borbe protiv korupcije,
- Dragan Slipac, zamjenik direktora Agencije za prevenciju korupcije i koordinaciju borbe protiv korupcije,
- Elizabet Tomasinec, politička savjetnica Delegacije EU u BiH i
- Jovica Katić, privremeni sekretar Komisije za izbor i praćenje rada Agencije za prevenciju korupcije i koordinaciju borbe protiv korupcije.

Predsjedavajuća je na početku upoznala članove Komisije s predloženim dnevnim redom, te otvorila raspravu.

Kako nije bilo prijedloga za dodatnim izmjenama i dopunama, konstatirano je da 8. sjednica Komisije za izbor i praćenje rada Agencije za prevenciju korupcije i koordinaciju borbe protiv korupcije ima slijedeći

DNEVNI RED

1. Usvajanje zapisnika 6. i 7. sjednice Komisije,
2. Prijedlog zakona o izmjenama i dopunama Zakona o Agenciji za prevenciju korupcije i koordinaciju borbe protiv korupcije,
3. Razmatranje Izvještaja o radu Agencije za prevenciju korupcije i koordinaciju borbe protiv korupcije za period od 1. 1. 2012. do 30. 6. 2012. (materijal Agencije za prevenciju korupcije i koordinaciju borbe protiv korupcije, broj: 05/8-50-19-916/12, od 17. 7. 2012.)
4. Tekuća pitanja.

Ad.1. Usvajanje zapisnika 6. i 7. sjednice Komisije

Kako o predloženim zapisnicima nije vođena rasprava, članovi Komisije odredili su se o njima.

Komisija je jednoglasno, sa 7 glasova „za“, usvojila Zapisnik 6. sjednice.

Zatim je Komisija, također jednoglasno, sa 7 glasova „za“, usvojila Zapisnik 7. sjednice.

Ad.2. Prijedlog zakona o izmjenama i dopunama Zakona o Agenciji za prevenciju korupcije i koordinaciju borbe protiv korupcije

Dužanka Majkić, predsjedavajuća Komisije, u uvodnim napomenama navela je da je rasprava o ovom prijedlogu zakona počela na prošloj sjednici Komisije, ali da je tada zaključeno da raspravu treba odgoditi, s obzirom da sjednici Komisije nije prisustvovao direktor Agencije za prevenciju korupcije i koordinaciju borbe protiv korupcije. Pojasnila je da se Zakonom regulira rad Komisije, koja bi u budućnosti trebalo da bude definirana kao nezavisno tijelo u okviru Parlamentarne skupštine BiH, koje provodi nadzor nad radom Agencije za prevenciju korupcije i koordinaciju borbe protiv korupcije. Još je navela da je o tekstu Prijedloga zakona upoznat i direktor Agencije, koji se saglasio s predloženim tekstom i nije imao prijedloga za dodatnim izmjenama i dopunama. Zatim je otvorila raspravu o Prijedlogu zakona.

U raspravi su učestvovali: Beriz Belkić, Mirsad Abazović, Milorad Vulić, Niko Lozančić, Dužanka Majkić i Borjana Krišto, članovi Komisije, te Sead Lisak i Dragan Slipac, predstavnici Agencije za prevenciju korupcije i koordinaciju borbe protiv korupcije.

Nakon sveobuhvatne rasprave o pojedinim članovima Prijedloga zakona, članovi Komisije izjasnili su se o pojedinim članovima, a zatim i o Prijedlogu zakona o izmjena i dopuna Zakona o Agenciji za prevenciju korupcije i koordinaciju borbe protiv korupcije u cjelini.

Komisija je jednoglasno, sa 8 glasova „za“, usvojila Prijedlog zakona o izmjenama i dopunama Zakona o Agenciji za prevenciju korupcije i koordinaciju borbe protiv korupcije, s prijedlogom da se s potpisima šest članova Komisije koji dolaze iz Parlamentarne skupštine BiH uputi u parlamentarnu proceduru u sljedećem tekstu:

„Član 1.

U Zakonu o Agenciji za prevenciju korupcije i koordinaciju borbe protiv korupcije ("Sl. glasnik BiH", broj 103/09) u članu 7. (Antikorupcijski principi) stav (1) tačka d) "Zaštita prijavljivanja korupcije" u prvoj rečenici iza riječi "prijavljivanja" brišu se riječi: "u dobroj vjeri". U istoj tački druga rečenica koja glasi:

"Ako lice koje prijavi eventualno koruptivno ponašanje ili nepropisno postupanje u obavljanju javne službe trpi posljedice, ima pravo na odštetu utvrđenu posebnim postupkom kod nadležnog organa, o čemu će Agencija donijeti poseban propis" briše se.

Član 2.

U članu 15. (Razrješenje direktora dužnosti) u stavu (1) tačka e) mijenja se i glasi:

"e) prekrši Kodeks ponašanja zaposlenih u Agenciji za vrijeme izvršavanja svojih obaveza".

Član 3.

Naziv Komisije definiran u naslovu Glave III: „Komisija za izbor i praćenje rada Agencije“ mijenja se i glasi: „Komisija za nadzor nad radom Agencije“.

U skladu s tim, naziv Komisije mijenja se i u članu 13. stav (1), članu 15. stav (2), naslovu člana 17. i u članu 17. stav (1) ovog zakona.

Član 4.

U članu 17. u stavu (2) iza riječi "imenuje" dodaju se riječi: "i razrješava."

U članu 17. st. (4) i (5) mijenjaju se i glase:

"(4) Mandat tri predstavnika iz Predstavničkog doma i tri predstavnika iz Doma naroda Parlamentarne skupštine Bosne i Hercegovine imenovanih u Komisiju traje koliko i mandat saziva Parlamentarne skupštine Bosne i Hercegovine u kojem su izabrani.

(5) Mandat dva predstavnika akademske zajednice i jednog predstavnika nevladinog sektora traje četiri godine od dana imenovanja u Parlamentarnoj skupštini Bosne i Hercegovine."

U članu 17. iza stava (5) dodaje se novi stav (6) koji glasi:

"(6) Izuzetno od odredbe stava (4) ovog člana, mandat tri predstavnika iz Predstavničkog doma i tri predstavnika iz Doma naroda Parlamentarne skupštine Bosne i Hercegovine, izabranih u sazivu 2006. – 2010., a koji su članovi Parlamentarne skupštine BiH i u mandatu 2010. – 2014., traje do kraja saziva 2010. - 2014".

Član 5.

Iza člana 17. dodaju se novi čl. 17a., 17b. i 17c. koji glase:

"Član 17a. (Definicija Komisije)

- (1) Komisija je nezavisno tijelo Parlamentarne skupštine Bosne i Hercegovine s nadležnostima utvrđenim članom 18 ovog zakona.*
- (2) Postupak i način rada Komisije, u mjeri u kojoj nisu propisani ovim zakonom, utvrđuju se Poslovníkom Komisije.*
- (3) Sekretarijat Parlamentarne skupštine Bosne i Hercegovine pruža stručnu i administrativno-tehničku podršku Komisiji.*
- (4) Sredstva za rad i naknade za rad članova Komisije osiguravaju se u budžetu Parlamentarne skupštine Bosne i Hercegovine.*
- (5) Visinu naknada i sredstava iz stava (4) ovog člana utvrđuje Zajednička komisija za administrativne poslove Parlamentarne skupštine Bosne i Hercegovine.*

Član 17b.

(Procedure za imenovanje predstavnika akademske zajednice i nevladinog sektora i razrješenje članova Komisije)

- (1) Predstavnike akademske zajednice i nevladinog sektora u Komisiji imenuje Parlamentarna skupština Bosne i Hercegovine na osnovu rang-liste koju je utvrdila ad hoc komisija Parlamentarne skupštine Bosne i Hercegovine.*
- (2) Ad hoc komisija ima šest članova, od kojih su tri poslanici koje imenuje Predstavnički dom, a tri člana su delegati koje imenuje Dom naroda Parlamentarne skupštine Bosne i Hercegovine.*
- (3) Ad hoc komisija Parlamentarne skupštine Bosne i Hercegovine provodi proceduru za izbor novih predstavnika akademske zajednice i nevladinog sektora u Komisiju tri mjeseca prije isteka mandata, odnosno u roku od 90 dana od dana razrješenja članstva u Komisiji ili smrti.*
- (4) Stručne službe Sekretarijata Parlamentarne skupštine Bosne i Hercegovine vode evidenciju o trajanju mandata članova Komisije, te u skladu s odredbama ovog člana pokreću postupak imenovanja novih članova.*

Član 17c.

(Razrješenje dužnosti članova Komisije)

Član Komisije može biti razriješen dužnosti:

- a) na lični zahtjev;*
- b) ostavkom na članstvo u Komisiji;*

- c) *ako nastupe okolnosti koje člana Komisije dovode u sukob interesa u skladu s važećim propisima;*
- d) *ako član Komisije bude osuđen za krivično djelo bez obzira na vrstu i visinu kazne, osim saobraćajnih prekršaja;*
- e) *ako se na osnovu mišljenja nadležne zdravstvene ustanove utvrdi da je trajno spriječen da obavlja svoju dužnost u Komisiji; “*

Član 6.

U članu 18. (Nadležnosti Komisije) stav (1) mijenja se i glasi:

„(1) Komisija ima sljedeće nadležnosti:

- a) *prati rad Agencije;*
- b) *provodi nadzor nad zakonitošću rada Agencije;*
- c) *pokreće postupak imenovanja direktora i zamjenika direktora Agencije u skladu sa Zakonom;*
- d) *pokreće postupak razrješenja direktora i zamjenika direktora Agencije u skladu s članom 15. Zakona;*
- e) *razmatra izvještaje o radu Agencije najmanje dva puta godišnje;*
- f) *razmatra izvještaje o reviziji finansijskog poslovanja Agencije.*

U istom članu u stavu (2) iza riječi "Agencije" zarez se zamjenjuje tačkom, a riječi: "niti smije zatražiti informacije o pojedinačnim slučajevima." brišu se.

Član 7.

Član 19. (Obavljanje administrativno-stručnih poslova) briše se.

Član 8.

Ovaj zakon stupa na snagu osmog dana od dana objavljivanja u „Službenom glasniku BiH“, a bit će objavljen i u službenim glasilima entiteta i Brčko Distrikta Bosne i Hercegovine. “

Ad.3. Razmatranje Izvještaja o radu Agencije za prevenciju korupcije i koordinaciju borbe protiv korupcije za period od 1. 1. 2012. do 30. 6. 2012.

Dušan Majkić, predsjedavajuća Komisije, u uvodnim napomenama navela je da je Agencija u skladu s članom 18. stav (1) tačka b. Zakona o Agenciji za prevenciju korupcije i koordinaciju borbe protiv korupcije Parlamentarnoj skupštini BiH dostavila 17. 7. 2012. Izvještaj o radu Agencije za prvih šest mjeseci 2012. godine. Zatim je zamolila direktora Agencije da ukratko prezentira Izvještaj članovima Komisije.

Sead Lisak, direktor Agencije za prevenciju korupcije i koordinaciju borbe protiv korupcije, obrazlažući pojedine segmente Izvještaja, naveo je da je on jasno prikazuje probleme s kojima se Agencija susreće u svakodnevnom funkcioniranju, u smislu njenog kadrovskog popunjavanja, smještaja i materijalno-tehničkog operiranja. Također je naveo da Izvještaj

sadrži pregled domaćih i međunarodnih aktivnosti u kojima su učestvovali predstavnici rukovodstva Agencije u izvještajnom periodu. Konstatirao je da, zbog kašnjenja u usvajanju Budžeta institucija BiH za 2012. godinu, između ostalog, nije izvršena nijedna procedura javnih nabavki, te da je finansiranje Agencije vršeno na osnovu Odluke o privremenom finansiranju institucija BiH. U zaključnim razmatranjima naveo je da su učinjeni izuzetni naponi da se usvoji Pravilnik o unutrašnjoj organizaciji u Agenciji za prevenciju korupcije i koordinaciju borbe protiv korupcije, te da je Agencija prihvatila sve primjedbe koje je uputilo Vijeće ministara BiH, a sve zaključci blagovremeno realizirani. Tako je u konačnici odlučeno da Agencija ima 45 izvršilaca, umjesto prvobitno predviđenih 57, od čega će, u skladu s raspoloživim finansijskim sredstvima, ukupan broj zaposlenih u Agenciji na kraju 2012. godine biti 15, što je svakako nedovoljno za njen svakodnevni operativni rad. Također je naveo da su projekti predviđeni za rad Agencije u okviru IPA fondova za 2009. i 2010. godinu na čekanju, do izgradnje njenih institucionalnih kapaciteta. Zaključio je da rukovodstvo Agencije čini maksimalne napore da ova institucija zaživi i postane operativna.

U raspravi o ovoj tački dnevnog reda učestvovali su sljedeći članovi Komisije: Beriz Belkić, Milorad Vulić, Mirsad Abazović, Niko Lozančić i Dušanka Majkić.

Nakon sveobuhvatne rasprave, članovi Komisije izjasnili su se o ovom izvještaju.

Komisija je jednoglasno, sa 7 glasova „za“, usvojila Izvještaj o radu Agencije za prevenciju korupcije i koordinaciju borbe protiv korupcije za period od 1. 1. 2012. do 30. 6. 2012.

Ad.4. Tekuća pitanja

U okviru ove tačke dnevnog reda nije vođena rasprava.

Sjednica je završena u 11,50 sati.

Privremeni sekretar Komisije
Jovica Katić

Predsjedavajuća komisije
Dušanka Majkić

Dostavljeno:

- naslovu
- a/a